

如來十力、十八不共、四無所畏----(華嚴宗講義)

【三明】

達於無學位，除盡愚闇，而於三事通達無礙之智明。即：(一)宿命明：謂明白了知我及眾生一生乃至百千萬億生之相狀，乃至姓名、苦樂等事之智慧。(二)天眼明：即了知眾死此生彼，復見我及眾生死時生時，乃身口意所作善惡之行，或生善道、惡道，皆悉能見之智慧。(三)漏盡明：即了知如實證得四諦之理，解脫漏心，滅除一切煩惱等之智慧。

又依大毘婆沙論，宿命明見過去事而生厭離，天眼明見未來事而生厭離，漏盡明既已厭離，乃欣樂涅槃；此外，宿命明可斷除常見，天眼明可斷除斷見，漏盡明則遠離此二邊而安住於中道。

另有菩薩明：據北本大般涅槃經卷十八載，菩薩明即般若波羅蜜，諸佛明即佛眼，無明明即畢竟空。〔涅槃經會疏卷十六、華嚴經探玄記卷十五〕

【六神通】

指六種超世間而自由無礙之力。即：(一)神境通：即神足通。即自由無礙，身能飛行無礙，隨心所欲現身，山海無礙，由此界沒，由彼界出；能大能小，隨意變現。(二)天眼通，能見六道眾生生死苦樂之相，及見世間一切種種形色，無有障礙。(三)天耳通：能聞六道眾生苦樂憂喜之語言，及世間種種之音聲。(四)他心通：能知六道眾生心中所念之事。(五)宿命通：能知自身及六道眾生之百千萬世宿命及所作之事。(六)漏盡通：斷盡一切三界見思惑，不受三界生死，而得漏盡神通之力。

【如來十力】

《大明三藏法數》：「如來十力(出圓覺略鈔并大智度論)如來證得實相之智，了達一切無能壞、無能勝故名力也。」

【一、知是處非處智力】謂如來於一切因緣果報，審實能知，如作善業即知定得樂報，名知是處；若作惡業，得受樂報，無有是處，名知非處。如是種種，皆悉徧知，故名知是處非處智力。

【二、知過現未來業報智力】謂如來於一切眾生過去、未來、現在三世業緣果報生處，皆悉徧知；故名知過現未來業報智力。

【三、知諸禪解脫三昧智力】梵語三昧，華言正定，謂如來於諸禪定，自在無礙，其淺深次第，如實徧知；故名諸禪解脫三昧智力。

【四、知諸根勝劣智力】謂如來於諸眾生根性勝劣，得果大小，皆實徧知；故名知諸根勝劣智力。

【五、知種種解智力】謂如來於諸眾生，種種欲樂、善惡不同，如實徧知；故名知種種解智力。

【六、知種種界智力】謂如來於世間眾生，種種界分不同(智慧、境界)，如實徧知；故名知種種界智力。

【七、知一切至處道智力】謂如來於六道有漏行所至處，涅槃無漏行所至處，如實徧知；故名知一切至處道智力。(六道有漏行者，身口意所作業行，而漏落生死也。)

無漏行者，謂一乘修戒定慧道品之行，而不漏落生死也)。

【八、知天眼無礙智力】謂如來證知天眼清淨，見諸眾生死時生時端正醜陋善惡業緣皆悉無礙故名知天眼無礙智力。

【九、知宿命無漏智力】謂如來於種種宿命，一世乃至百千萬世、一劫乃至百千萬劫，死此生彼、死彼生此，姓名、飲食、苦樂、壽命，如實徧知；故名知宿命無漏智力(劫梵語具云劫波華言分別時節)。

【十、知永斷習氣智力】(漏盡智力)。謂如來於一切惑餘習氣分，永斷不生，如實徧知；故名知永斷習氣智力。

【四無所畏】(出大智度論)、《大明三藏法數》

此四通言無畏者，由佛十力之智內充，明了決定，故於大眾中，凡有所說，則無恐懼之相，故名無所畏。

【一、一切智無所畏】一切智者於世間、出世間一切諸法，盡知盡見也。無所畏者，如佛言：我是一切正智人，故得安隱，得無所畏，在大眾中，作師子吼，能轉法輪，諸沙門、婆羅門、若天魔(他化自在天)、若梵(天)復餘眾，實不能轉，是一切智無所畏。

【二、漏盡無所畏】漏盡者惑業生死俱盡也，無所畏者，如佛言我一切漏盡，故得安隱；得無所畏，在大眾中作師子吼，能轉法輪，諸婆羅門、若天魔、梵、若復餘眾，實不能轉，是為漏盡無所畏。

【三、說障道無所畏】說障道者，說彼魔外障蔽聖道之法也。無所畏者，如佛言我說障法，故得安隱，得無所畏，在大眾中作師子吼，能轉法輪。諸婆羅門、若天魔、梵、若復餘眾，實不能轉，是為說障道無所畏。

【四、說盡苦道無所畏】說盡苦道者，說能盡諸苦之道法也。無所畏者，如佛言：我所說聖道，能出世間，能盡諸苦，故得安隱，得無所畏。在大眾中作師子吼，能轉法輪，諸婆羅門、若天魔、梵、若復餘眾，實不能轉，是為說盡苦道無所畏。」

【十八不共法】

《大明三藏法數》：「不共法者，謂諸佛之智內充，無畏之德外顯，一切功德智慧，超過物表，不與凡夫、二乘及諸菩薩共有也。

【一、身無失】謂佛從無量劫來，常用戒定智慧、慈悲以脩其身，此諸功德滿足，故一切煩惱皆盡，是名身無失。

【二、口無失】謂佛具無量智慧辯才，所說之法，隨眾機宜，皆得證悟，是名口無失。

【三、念無失】謂佛脩諸甚深禪定，心不散亂。於諸法中，心無所著，得第一安隱處故名念無失。

【四、無異想】謂佛於一切眾生平等普度，心無揀擇，是名無異想。

【五、無不定心】謂佛行住坐臥，常不離甚深勝定，是名無不定心。

【六、無不知已捨】謂佛於一切法，悉皆照知，無有一法不了知而捨之者，是名無不知已捨。

【七、欲無減】謂佛具眾善，常欲度諸眾生，心無厭足，是名欲無減。

【八、精進無減】謂佛身心精進滿足，常度一切眾生，無有休息，是名精進無減。

【九、念無減】謂佛於三世諸佛之法，一切智慧相應滿足，無有退轉，是名念無減。

【十、慧無減】謂佛具一切智慧，無邊、無際不可盡故，隨慧而說亦無有盡，是名慧無減。

【十一、解脫無減】謂佛遠離一切執著，具二種解脫：一者有為解脫，謂無漏智慧相應解脫。二者無為解脫，謂一切煩惱淨盡無餘，是名解脫無減。（無漏者，謂不漏落生死也，無為者，謂稱性而修，無所作為也）。

【十二、解脫知見無減】謂佛於一切解脫中，知見明了分別無礙，是名解脫知見無減。

【十三、一切身業隨智慧行】謂佛現諸勝相，調伏眾生，稱智演說一切諸法，令其各得解悟證入，是名身業隨智慧行。

【十四、一切口業隨智慧行】謂佛以微妙清淨之語，隨智而轉化導，利益一切眾生，是名一切口業隨智慧行。

【十五、一切意業隨智慧行】謂佛以清淨意業，隨智而轉入眾生心而為說法，除滅無明癡暗之膜，是名意業隨智慧行。

【十六、智慧知過去世無礙】謂佛以智慧照知過去世所有一切，若眾生法、若非眾生法，悉能遍知無礙，是名智慧知過去世無礙。

【十七、智慧知未來世無礙】謂佛以智慧照知未來世所有一切，若眾生法、若非眾生法，悉能徧知無礙，是名智慧知未來世無礙。

【十八、智慧知現在世無礙】謂佛以智慧照知現在世所有一切，若眾生法、若非眾生法，悉能徧知無礙，是名智慧知現在世無礙。」

【佛十無礙】（出華嚴經隨疏演義鈔）

謂盧舍那佛說華嚴經現法界無盡身雲，真應相融、一多無礙、雖常在此處，而不離他處；雖遠在他方，而恒住此方；身雖不異，而亦非一；同時異處，而是一身；蓋佛之體用，與法界同故，混萬化而即真，會精麤而一致；圓融無礙，隨機教異耳。（盧舍那，華言淨滿，亦云光明遍照，真應者即真身、應身也）。

【一、用周無礙】謂佛於剎塵等處，現法界身雲，起無邊業用，故經〈如來現相品〉云：「一一微塵中，能證一切法，如是無所礙，周行十方國。」又云：「佛演一妙音，周聞十方國，眾音悉具足，法雨皆充滿，如是等用無量無邊法界微塵，無不周徧。」是為用周無礙。

【二、相徧無礙】謂佛於十方一切世界，無量佛剎，種種神變，皆有如來示現受生之相，隨現一相，眾相皆具，萬德斯圓，是為相徧無礙。

【三、寂用無礙】謂佛常住三昧為寂，無妨利物為用，即定即用，無礙自在。〈世主妙嚴品〉云：「如來境界不可量，寂而能演遍十方；是為寂用無礙。」

【四、依起無礙】謂佛雖寂用無心，而能依海印三昧之力，即起無礙之用。〈賢首品〉云：「眾生形相各不同，行業音聲亦無量，如是一切皆能現，海印三昧威神力，是為依起無礙。」（海印三昧：謂香海澄淨，湛然不動，一切形像，皆於中現，如印印文，以喻如來智海無心，一切眾生皆在其中頓現也）。

【五、真應無礙】真即遮那真身也，應即釋迦應身也；真身是體，應身是用；全體起用，用即是體；故釋迦、遮那圓融自在，本無二體。〈世主妙嚴品〉云：「如來真

身本無二，應物分形滿世間，是為真應無礙。」

【六、分圓無礙】分，即支分；圓，即全身；謂支分不礙全身，全身不礙支分，故遮那一身分，手足眼耳乃至一毛，皆有舍那全身。〈如來現相品〉：「佛身一切相，悉現無量佛，普入十方界，一一微塵中。」是為分圓無礙。

【七、因果無礙】謂佛往昔本生行菩薩行，修習波羅蜜，因而證遮那佛果，故所受報身及所成事業，亦現十方。一切菩薩身雲，自在無礙。〈世主妙嚴品〉：「佛以本願現神通，一切十方無不照，如佛往昔修治行，光明網中皆演說。」是為因果無礙。

【八、依正無礙】依，謂依報，即佛所依之國土；正，謂正報，即佛能依之色身。依正相入，二皆無礙。疏鈔玄談云：「或作日月遊虛空，或作河池井泉水。」是為依正無礙。

【九、潛入無礙】謂佛智潛入眾生心內，即名如來藏。雖作眾生，不失自性，如大海水因風成波，而不失濕性。佛亦如是，隨眾生所感，萬類殊形，而不失自性。〈世主妙嚴品〉：「汝應觀佛一毛孔，一切眾生悉在中。」是為潛入無礙。

【十、圓通無礙】謂佛融大法界而為其身，理無不具，事無不攝，故一多依正，人法因果，此彼無礙。〈夜摩天宮菩薩說偈品〉云：「一身為無量，無量復為一；了知諸世間，現形遍一切。是為圓通無礙。」

【佛十種化不失時】（出華嚴經）

【一、成等正覺化不失時】謂如來出現世間成佛道已，隨機應感，適彼時緣，而起化導，是為成等正覺化不失時。

【二、成熟有緣化不失時】謂如來了知眾生善根成熟，隨時化度，咸令解脫，是為成熟有緣化不失時。

【三、授菩薩記化不失時】謂如來能知菩薩久修梵行，功業成就者，即與授菩提之記，是為授菩薩記化不失時。

【四、示現神力化不失時】謂如來隨其眾生所宜，示現威神之力，令生信樂，而得開解，是為示現神力化不失時。

【五、示現佛身化不失時】謂如來隨順眾生所宜，而現相好之身，令其咸獲利益，是為示現佛身化不失時。

【六、住於大捨化不失時】謂如來修無著行，具大捨心，隨順時緣，化利一切眾生，而不見有能化所化之相，是為住於大捨化不失時。

【七、入諸聚落化不失時】謂如來以大悲心，隨順時緣，攝化一切眾生遍入城邑、聚落，普作饒益，是入諸聚落化不失時。

【八、攝諸淨信化不失時】謂如來具無礙智，能知眾生清淨信心，隨順時緣而攝化之，是為攝諸淨信化不失時。

【九、調惡眾生化不失時】謂如來以夫威神之力，調伏暴惡眾生，令其捨惡遷善，不失時宜，是為調惡眾生化不失時。

【十、現佛神通化不失時】謂如來以不思議力，示現神通，於一念中，饒益一切眾生，不失時宜，是為現佛神通化不失時。」